

四庫全書

集部

欽定四庫全書

集部
餘師錄卷三

詳校官石中允_臣薩敏

主事銜_臣徐以坤覆勘

謄錄監生_臣李承厚

謄錄監生_臣章傳

欽定四庫全書

餘師錄卷三

宋 王正德 撰

顏之推

顏之推家訓云夫文章者原出五經詔命策檄生於書
者也序述論議生於易者也歌詠賦頌生於詩者也祭
祀哀誄生於禮者也書奏箴銘生於春秋者也朝廷憲
章軍旅誓誥敷顯仁義發明功德牧民建國不可暫無
用一本作施多途施至於陶冶性靈從容諷誦入其滋味亦樂事

也行有餘力則可習之然而自古文人多陷輕薄屈原
露才揚己顯暴君過宋玉體貌容冶見遇俳優東方曼
倩滑稽不雅司馬長卿竊貨無操王褒過章僅約揚雄
德敗美新李陵降辱夷虜劉歆反覆莽世傅毅黨附權
門班固盜竊父史趙元叔抗疎過度馮敬通浮華擯壓
馬季長佞媚獲誚蔡伯喈同惡受誅吳質詆忤鄉里曹
植悖慢犯法杜篤乞假無厭路粹隘狹已甚陳琳實號
麤疎繁欽性無檢格劉楨屈強輸作王粲率躁見嫌孔

融禍衡誕傲致殞楊修丁廙扇動取斃阮籍無禮敗俗
嵇康凌物凶終傳元忿鬪免官孫楚矜誇凌上陸機犯
順履險潘岳乾沒取危顏延年負氣摧黜謝靈運空踈
亂紀王元長凶賊自貽謝元暉侮慢見及凡此諸人皆
其翹秀者不能悉紀大較如此至于帝王亦或未免自
昔天子而有才華者唯漢武魏太祖文帝明帝宋孝武
帝皆負世議非懿德之君也自子苻子夏荀況孟軻枚
乘賈誼蘇武張衡左思之儔有盛名而免過患者時復

聞之但其損敗居多爾每嘗思之原其所積文章之體
標舉興會發引性靈使人矜伐故忽於持操果於進取
今世文士此患彌切一字愜當一句清巧神厲九霄志
凌千載自吟自賞不覺更有旁人加以砂礫所傷慘於
矛戟諷刺之禍速乎風塵深宜防慮以保元吉

學問有利鈍文章有巧拙鈍學累功不妨精熟拙文研
思終歸蚩鄙但成學士自足爲人必乏天才勿強操筆
也吾見世人至無才思自謂清華流布醜拙亦已衆矣

江南號為吟

力正反

癡符近在并州有一士族好為可笑

詩賦詭擊

上音寃相呼
詭也下音瞥

邢魏諸公衆共嘲弄戲相讚說

便擊牛釀酒招延聲譽其妻明鑒婦人也泣而諫之此人嘆曰才華不為妻子所容何況行路至死不覺自見之謂明此誠難也

學為文章先謀親友得其評裁知可施行

一本無此四字然後

出手慎勿師心自任取笑旁人自古執筆為文章何可勝言然至於宏麗精華不過數十篇爾但使不失體裁

辭義可觀便稱才士要須動俗蓋世亦俟河之清乎
或問揚雄曰吾子少而好賦雄曰然童子雕蟲篆刻壯
夫不為也余竊非之曰虞舜歌南風之詩周公作鴟鴞
之詠吉甫史克雅頌之美者未聞皆在幼年累德也孔
子曰不學詩無以言自衛反魯樂正雅頌各得其所大
明孝道引詩證之揚雄安敢忽之也若論詩人之賦麗
以則辭人之賦麗以淫但知變之而已又未知雄自為
壯夫何如也著劇秦美新妄投于閤周章怖懼不達天

命童子之為爾袁亮以勝老子

按袁亮今本作桓譚

葛洪以方仲

尼使人嘆息此人直以曉筭術解陰陽故著太元經為數子所惑其遺言餘行孫卿屈原之不及安敢望大聖之清塵且太元今竟何用乎不翅覆醬瓿而已

齊世有辛毗者清幹之士官至行臺尚書嗤鄙文學嘲劉逖云君輩辭藻譬若朝菌須臾之翫非宏才也豈比吾徒十丈松樹常有風霜不可凋悴劉應之曰既有寒木又發春華何如也辛笑曰可哉凡為文章猶乘騏驎

雖有逸氣當以銜策制之勿使流亂軌躅放意填阮岸也文章當以理致為心腎氣調為筋骨事義為皮膚華麗為冠冕今世相承趨末棄本率多浮艷辭與理競辭勝而理伏事與才爭事繁而才損放逸者流宕而忘歸穿鑿者補綴而不足時俗如此安能獨違但務去太甚爾必有盛才重譽改革體裁者實吾所希古人之文宏才逸氣體度風格去今實遠但緝綴疎朴未為密綴爾今世音律諧靡章句偶對諱避精詳賢於往昔多矣宜

以古之製裁為本今之辭調為末並須兩存不可偏棄也

沈隱侯曰文章當從三易易見事一也易識字二也易讀誦三也邢子才常曰沈侯文章用事不使人覺若曾

臆語也

按易見事以下原本脫去今據家訓添入

深以此服之祖孝徵亦嘗

謂吾曰沈詩云崖傾護石髓此豈似用事耶邢子才魏收俱有重名時俗準的以為師匠邢賞服沈約而輕任昉魏愛慕任昉而毀沈約每於譚譙辭色以之鄴下紛

紘名為甥黨祖孝徵嘗謂吾曰任沈之是非乃邢魏之優劣也

吳均集有破鏡賦昔者邑號朝歌顏淵不舍里名勝母

曾參斂襟

按淮南子云墨子非樂不入朝歌鄒陽書亦云邑號朝歌墨翟迴車今作顏淵蓋據論語

誤考識

蓋忌夫惡名之傷實也破鏡乃是凶逆之獸事見

漢書為文幸避此名也比世往往見有和人詩者題云敬同孝經云資於事父以事君而敬同不可輕言也梁世費昶詩云不知是耶非殷雲詩云飄颻雲母舟簡文

曰旭既不識其父湮又飄颺其母此雖悉古事不可用也世人或有引詩伐鼓淵淵者宋書已有屢遊之誚如此流比幸須避之北面事親別舅擣渭陽之詠堂上養老送兄賦栢山之悲皆大失也舉此一隅觸塗宜謹

凡代人為文皆作彼語理宜然矣至於哀傷凶禍之辭不可輒代蔡邕為胡金盈作母靈表頌曰悲母氏之永不條委我而夙喪又為胡顥作其父銘曰葬我考議郎君袁三公頌曰猗歟我祖出自有嬌王桀為潘文則思

親詩云躬此勞瘁鞠予小人庶我顯妣克保遐年而並
載乎邕粲之集此例甚衆古人之所行今世以為諱也
陳思王武帝誄遂深永蟄之思潘岳悼亡賦乃愴手澤
之遺是方父於蟲譬婦為考也蔡邕楊秉碑云統大麓
之重潘尼贈盧景宣詩云九五思飛龍孫楚王驃騎誄
云奄忽登遐陸機父誄云億兆宅心謹叙百揆姊誄云
覩天之妹今為此言則朝廷之罪人也王粲贈楊德祖
詩云戎君餞之其樂洩洩不可妄施人子况儲君乎

挽歌辭者或云古者虞殯之歌或云出自田橫之客皆為生者悼往告哀之意陸平原多為死人自嘆之言詩格既無此例又乖製作大意

凡詩人之作刺箴美頌各有源流未嘗混雜善惡同篇也陸機為齊謳篇前叙山川物產風教之盛後章忽鄙山川之情殊失厥體其為吳趨行何不陳子光夫差乎京洛行何不述赧王靈帝乎

自古宏才博學用事誤者有矣百家雜說或有不同書

儻湮滅後人不見故未敢輕議今指知決紕繆者略舉
一兩端以為誡云詩云有鷺雉鳴又曰雉鳴求其牡毛
傳亦曰鷺雉雉聲又云雉之朝雉尚求其雌鄭元注月
令亦云雉雄雉鳴潘岳賦曰雉鷺鷺以朝雉是則混雜
其雌雄矣詩云孔懷兄弟孔甚也懷思也言甚可思也
陸機與長沙顧母書述從祖弟士璜死乃言痛心拔腦
有如孔懷心既痛矣即爲甚思何故方言有如也觀其
此意當謂親兄弟爲孔懷詩云父母孔邇而呼二親爲

孔邇於義通乎異物志云擁劍狀如蟹但一螯偏大爾
何遜詩云躍魚如擁劍是不分魚蟹也漢書御史府中
列栢樹常有野鳥數千棲宿其上晨去暮來號朝夕鳥
而文士往往誤作烏鳶用之抱朴子說項曼都詐稱得
仙自云仙人以流霞一杯與我飲之輒不饑渴而簡文
詩云霞流抱朴枕亦猶郭象以惠施之辨為莊周言也
後漢書囚司徒崔烈以銀鐺鐐上音狼下音當銀鐺大鐐也世
間多誤作金銀字武烈太子亦是數千卷學士嘗作詩

云銀鑰三公脚刀撞僕射頭為俗所誤

李朴

李朴送徐行中序云吾嘗論唐人文章下韓退之為柳
子厚下柳子厚為劉夢得下劉夢得為杜牧下杜牧為
李翱皇甫湜最下者為元稹白居易蓋元白以澄澹簡
質為工而流入於鄙近譬如哇淫之歌雖足以快心便
耳而類之韶濩翱湜優柔泛濫而詞不掩理杜牧清深
勁峻而體乏步驟夢得俊逸麗縟而時窘邊幅子厚雄

健飄肆有縣崖峭壑之勢不幸不發於仁義而發於躁
誕至退之而後淳粹溫潤駸駸乎爲六經之苗裔何則
文章者天地之奇氣造物者常嗇於與人故愚者終身
而不得智者得其幽微之思勇者得其果敢之氣辨者
得其玲瓏之聲巧者得其藻繪之容是數者雖能得而
不能盡然猶足以取高於斯世蓋必有兼是數者之才
而後得其純全中正之氣經緯五藏雕鏤萬化明以寓
物象之形容幽以露鬼神之奇怪小而歌詠乎蟲魚鳥

獸之情大而羽翼乎禮樂刑政之具隨時抑揚為歌頌
譏刺之音以舒發其懽愉愁嘆堙鬱之志而終始出入
於仁義為禹稷之謨伊周之訓箕子之疇伏羲之易孔
子之春秋而天地之蘊始盡矣

書柳子厚集云子厚文辭淳正雖不及退之至氣格雄
絕亦退之所不及然子厚論著大抵非怨憤必刺毀辨
論語下篇尤害道論天地陰陽猶果蓏草木不能賞功
罰罪雖詆諧之詞施於仁義教化其蟲螻歟至若傳河

間李赤事以譏切當世屬意明白而卒身自蹈其弊豈
所謂工於訶人而拙於用已耶吾不寶夫論之如是也
與楊宣德書唐人稱子美為詩史者謂能紀一時事耳
至於安得廣廈千萬間為茅屋歌安得壯士提天綱為
石犀行安得壯士挽天河為洗兵馬又安在其不相襲
也故論文者當論其是與否不必以好異夸世俗為能
六經不以文論後之洗洋奔肆不見邊幅莫如馬遷荀
況之書言辭相似者十三四遷載趙武靈王欲胡服與

商君論變法百餘言間不同才數字如傳蘇秦說六國見魏王而曰魏天下之強國也王天下之賢王也見楚王又曰楚天下之強國也王天下之賢王也執事能謂二人者淺狹無他有耶

書鍾陵集云文章取足於辨理詞有餘而意不足者如人之附贅愈多而愈病非有簡質者之步驟泛濫者夸侈麗也蓄之厚則徑省而不浮養之薄則亂雜而無統不可以相能也張元淳出其父仲通鍾陵集若干卷以

示余余見而異之曰斯文也其辨理之文歟粹而溫簡而嚴徑直而優游辨析而有體不爲虛辭濫說以取世俗之嗜好而終始曲折要必出入於仁義以扶導於教化因物寓意發爲歌詩可諷可勸可興可感至五言古風尤澄澹峻拔讀之如與幽人烈士正冠而道古使人竦然生愛敬之意表奏論議切情近事以道人之所難言與夫治亂安危之隱而未見者無不審訂規畫而反覆之凜凜乎忠義之氣溢於中而形於外者也

謁顧子敦侍郎書云文章涉秦漢而病夫六經之於道
譬猶一氣之運產出萬化孟軻揚雄爲之五行四時之
用蓋書道治亂興廢之迹故其辭顯春秋賞善絕惡歸
諸正故其辭微易以四象告吉凶故其辭深而通禮以
齋莊恭敬之心達於籩豆玉帛故其辭典而嚴詩以君
臣父子之情詠於竹絃於絲故其辭婉而順下三代而
道德之意不傳在戰國則蘓秦張儀以縱橫病韓非申
商以刑名病莊周列禦寇又取仁義法度而槌提絕滅

之爲窈茫荒怪之說漢司馬遷得其汪洋峻逸之氣以
馳騁上下數千載而顛倒橫斜識不逮理歷晉魏齊梁
而光沉氣塞埋藏腐蝕頽波橫流淫靡一轍唐興三光
五嶽之氣不分文風復起韓愈得其溫淳深潤以爲貫
道之器柳子厚得其豪健雄肆飄逸果決者僅足窺馬
遷之藩鍵而類發於躁誕下至孫樵杜牧峻峯激流景
出象外而裂窘邊幅李翱劉禹錫刮垢見竒清勁可愛
而體乏雄渾皇甫湜白居易閑澹簡質斲去雕篆而拙

迹每見回宮轉角之音隨時間作類乏韶夏皆淫哇而不可聽某鴛鴦鈍竊亦有志於古者側聞閣下以德行文章取名於時士之有志於道者爭出所長來筮鴛鴦駁聽於下風竊自增氣不識龍門之下可以衽草褐而一叩乎

蘓籀

蘓籀叙蘓轍子由遺言云公爲籀講老子數篇曰高於

孟子二三等矣

按蘓氏父子皆尊孟子此或非轍之言疑因轍有老子注而附會之

公言仲尼春秋或是令邱明作傳以相發明

東坡幼年作却鼠刀銘公作缸硯賦曾祖稱之命佳紙
繕寫裝飾釘於所居壁上

公曰子瞻之文奇余之文但穩耳

張十二之文波瀾有餘而出入整理骨格不足秦七波
瀾不及張而出入徑健簡捷過之要知二人後來文士
之冠冕也

賈誼宋玉賦皆天成自然張華鷦鷯賦亦佳妙子瞻諸
文皆有奇氣至赤壁賦髣髴屈原宋玉之作漢唐諸公

皆莫及也

公曰余少年苦不達爲文之節度讀上林賦如觀君子佩玉冠冕還折揖讓音吐皆中規矩終日威儀無不可觀

公曰予少作文要使心如旋床大事大圓成小事小圓轉每句如珠圓

公曰余黃樓賦學兩都賦體晚年來不作此工夫之文公曰申包胥哭秦庭一章子瞻誦之得爲文之法

公曰范蜀公少年儀矩任真爲文善腹藁作賦場屋中
默坐至日晏無一語及下筆頃刻而就同試者笑之范
公遂魁成都

公曰莊周養生主一篇誦之如龍行空爪趾鱗翼所及
皆自合規矩可謂奇文

唐儲光羲詩高處似陶淵明平處似王摩詰

歐陽公碑版今世第一集中怪竹辯乃甚無謂非所以
示後世

唐皇甫湜論朝廷文字以燕許爲宗文奇則怪矣

公曰李方叔文似唐蕭李所以可喜韓駒詩似儲光羲
公曰讀書須學爲文餘事作詩人耳

公曰讀書百遍經義自見

族兄在廷問學文如何曰前輩但看多做多而已

公言班固諸叙可以爲作文法式

公曰李太白詩過人其平生所享如浮花浪蘂其詩云
羅幃卷舒似有人開明月直入無心可猜不可及

公論唐人開元燕許云文氣不振倔强其間自韓退之一變復古追還西漢之舊然在許昌觀唐文粹稱其碑頌徃徃愛張蘓之作又覽唐皇甫湜持正諭業云所譽燕許文極當文奇則涉怪施之朝廷不須怪也蓋亦取燕許矣

汪藻

汪藻作蘓魏公文集序云所貴於文者以能明當世之務達群物之情使千載之下讀之者如出乎其時如見

其人也若夫善立言者不然文雖同乎人而其所以爲
文有非人之所得而同者孟子七篇之書叙戰國諸侯
之事與夫梁齊君臣之語其辭極於辯博若無以異乎
戰國之文也揚子之書數萬言言秦漢之際爲最詳簡
雅而闕深若無以異乎西漢之文也至其推性命之隱
發天人之微粹然一歸於正使學者師用比之六經則
當時所謂儀秦犀首谷水杜欽輩豈惟無以望其門牆
殆冠履之不侔也宋興百餘年文章之變屢矣楊文公

倡之於前歐陽文忠公繼之於後至元豐元祐間斯文
幾於古而無遺恨矣蓋吾宋極盛之時也

作鮑欽止小集序云古之作者無意於文也理至而文
則隨之如印印泥如風行水上縱橫錯綜粲然而成者
夫豈待繩削而後合哉六經之書皆是物也逮左氏傳
春秋屈原作離騷始以文章自為一家而稍與經分漢
公孫宏董仲舒蕭望之匡衡以經術顯者也司馬遷相
如枚乘王褒以文章著者也當是時已不能合而爲一

況凌夷至於後世流別而爲六七靡靡然入於流連光
景之文哉其去經也遠矣本朝自熙寧元豐士以談經
相高而黜雕蟲篆刻之習庶幾其復古矣學者用意太
過文章之氣日衰欽止少從王氏學又嘗見眉山蘇公
故其文汪洋閎肆粹然一本於經而筆力豪放自見於
馳騁之間深入墨客騷人之域於二者可謂兼之自黃
魯直張文潛沒欽止之詩文獨行於世而詩尤高妙清
新每一篇出士大夫爭相讀熟余嘗恨未見其全書今

得此集讀之曰嗟乎欽止於斯文可謂豪髮無遺恨矣
作永州柳先生祠堂記云周衰言文章之盛者莫如漢
唐賈誼馳騁於孝文之初時漢興纔二十餘年耳談治
道述騷辭追還三代之風如此其速自是踵相躡有人
末而至於劉向揚雄益精深不可及去古未遠故也唐
承貞觀開元習治之餘以文章顯者如陳子昂蕭穎士
李邕燕許之流固不爲無人而東漢以來猥并之氣未
除也至元和始粹然一返於正其所以臻此者非先生

及昌黎韓公之力歟故以唐三百年世所推尊者曰韓柳而已豈非盛哉

呂居仁

呂居仁作遠遊堂詩集序云頃歲嘗與學者論學詩當識活法所謂活法者規矩備具而能出於規矩之外變化不測而卒亦不背規矩也是道也蓋有定法而無定法無定法而有定法知是者則可以語活法矣世之學者知規矩固已甚難況能遽出規矩之外而有變化不

測乎謝元暉有言好詩流轉圓美如彈丸此真活法也
元暉雖未能實踐此理言亦至矣近世黃魯直首變前
作之弊而後學者知所趨向畢精盡知左規右矩庶幾
至於變化不測而遠與古人比蓋皆由此道入也然予
區區淺末之論皆漢魏以來有意於文者之法而非無
意於文者之法也孔子曰興於詩又曰詩可以興可以
觀可以羣可以怨邇之事父遠之事君多識於鳥獸草
木之名今之爲詩者果可以使人讀之而能興觀羣怨

矣乎果可以使人讀之而能知所以事父事君而能識
鳥獸草木之名乎爲之而不能使人如是則如勿作雖
然文猶質也質猶文也君子於文有不得已焉者也吾
友夏均父蘄人也賢而有文章其於詩蓋得所謂規矩
備具而出於規矩之外變化不測者其天才於流輩獨
高衆苦不足而均父常用之若不盡也

潘邠老語饒德操云作長詩須有次第本末方成文字
譬如做客見主人須先入大門見主人升階就坐說話

乃退今人作文字都無本末次第緣不知此理也

孟子或問百里奚自鬻於秦一章與韓退之論思元賓而不見見元賓之所與者猶吾元賓也及曾子固答李泂書最見抑揚反覆處如此等類宜皆詳讀

論語禮記文字簡淡不厭似非左氏所可及也列子氣平文緩亦非莊子步驟所能至也東坡晚年叙事文字多法柳子厚而豪邁之氣非子厚所能及也

左氏之文語有盡而意無窮如獻子辭梗陽人一段所

謂一唱三歎有遺音者也如此等處皆是學文養氣之本不可不深思也

班固叙事詳密有次第專學左氏如叙霍上官相失之由正學左氏記秦穆晉惠相失處也

孫子十三篇論戰守次第與山川險易長短小大之狀皆曲盡其妙推高發隱使物無遁情此尤文章妙處

讀三蘓進策涵養吾氣他日下筆自然文字滂沛無吝畱處韓退之文渾大廣遠難闕測柳子厚文分明見規

模次第初學者當先學柳文後熟韓文則工夫自易
古人文章一句是一句句皆可作題目如尚書可見
後人文章累千百言不能就一句事理只如選詩有高
古氣味自唐以下無復此意此皆不可不知也

徐師川云爲詩文常患意不屬或只得一句語意便盡
欲足成一章又惡其不相稱但能知意不屬則學可進
矣凡注意作詩文或得一兩句而止若未有其次句即
不若且休養銳以待新意若盡力須要相屬譬如力不

敵而苦戰一敗之後意氣沮矣

文氣不分明指切從容委曲而意以獨至惟左傳爲然如當時諸國往來之辭與當時君臣相告相讓之語蓋可見矣亦是當時聖人餘澤未遠涵養自別故辭氣不迫如此非後世人專學言語者也

文章大要須以西漢爲宗此人所可及也至於上面一等則須審己才分不可勉強作也如秦少游之才終身從東坡步驟次第止宗西漢可謂善學矣

陸士衡文賦云立片言以居要乃一篇之警策此要論也文章無警策則不足以傳世蓋不能竦動世人如老杜及唐人諸詩無不如此但晉宋間人專致力如此故失於綺靡而無高古氣味老杜詩云語不驚人死不休所謂驚人句即警策也

載馳詩反覆說盡情意學者宜考蒹葭說得事理明白尤宜致思也

漢高紀詔令雄健孝文紀詔令溫潤去先秦古書不遠

後世不能及至孝武紀詔令始事文采文亦寢衰矣
老杜歌行最見次第出入本末而東坡長句波瀾浩大
變化不測如作雜劇打猛諢入却打猛諢出也

東坡云意盡而言止者天下之至言也然而言止而意
不盡尤爲極至如禮記左傳可見

韓退之答李翊書老蘓上歐公書最見學文養氣妙處
西漢自王褒以下文字專事詞藻不復簡古而谷永等
書雜引經傳無復已見而古學遠矣此學者所宜深戒

檀弓與左氏紀太子申生事詳略不同讀左氏然後知檀弓之高遠也

劉勰辨騷云叙情怨則鬱伊而易感述離居則愴快而難懷此知文者也言以述志文以宣言觀此可知但其間自有遠近高下抑揚微顯

作文必要悟入處悟入必自工夫中來非僥倖可得也如老蘓之於文魯直之於詩蓋盡此理矣

老杜云新詩改罷自長吟文字頻改工夫自出近世歐

公先貼於壁時加竄定有終篇不留一字者

學者須做有用文字不可盡力於虛言有用文字議論文字是也議論文字須以董仲舒劉向等爲主禮記周禮及新序說苑之類皆當貫穿熟考則做一日便有一日工夫近世文字如曾子固諸序尤須詳味

左氏景公欲更晏子之宅一段反覆再三至於辭理俱盡無復餘蘊此當深考也

醫書論脉之形狀病之證驗無一字妄發乃於借物爲

諭尤見工夫大抵見之既明則發之於言語自然分曉
觀此等書可見

劉知幾云叙事之省其流有二焉一曰省句二曰省字
如左傳宋華耦來盟稱其先人得罪於宋魯人以爲敏

夫以鈍者稱敏

魯人爲鈍人也
記中有注解

則明焉者所嗤此爲省

句也春秋經曰隕石於宋五夫聞之隕視之石數之五
加以一字太詳減其一字太略求諸折中簡要合理此
爲省字也其反於是者若公羊稱卻克眇季孫行父禿

孫良夫跛齊使跛者逆跛者禿者逆禿者眇者逆眇者
蓋宜除跛者已下字但云各以其類逆者必於事皆再
述此於文殊費尤爲煩句也漢書張蒼傳云年老口中
無齒蓋於此一句之中去年及口中可矣此六文成句
而三字妄加此爲煩字也然則省句爲易省字爲難

呂氏家塾廣記云歐陽文忠公每爲文既成必自竄易
至有不留本初一字者其爲大文章則書而傳之屋壁
出入觀省之至於尺牘單簡亦必立藁其精審如此每

一篇出土大夫皆傳寫諷誦唯覩其渾然天成莫究斧

鑿之跡也

魯於諸子學舍中見與
劉原父書一書十數本

劉摯作張文定玉堂集叙云甚哉辭之不可以已也夫
萬事異理非言不命四方異情非辭弗通詩不云乎辭
之輯矣民之洽矣傳亦有之子產有辭諸侯賴之是以
君天下者必使其臣贊爲辭而後出之周御史掌贊書
漢尚書作詔文此其官之見於古者歷代因之其任愈
重夫以堂宇之一言行乎四方萬里之外不高深簡嚴

不足以重王體又欲其誠之宣不優柔曲折不足以究
民聽又欲其言之約三代而上經聖人所定不可尚已
三代而下作者汙隆隨時屢變其間承平之時訓詞深
厚號令溫雅有古風烈而傾側之際書詔所下武夫悍
卒揮涕感動終於享好治之譽建持危之功則潤色之
效豈小補哉自慶歷至於熙寧惟仁祖恭儉寬大英祖
克篤前烈主上長駕遠馭略不世出三朝政績巍巍煥
煥非尋常耳目所能觀聽而於斯時典冊告命多出公

手上之仁心德意國之威福所指明布諭下昭如日星
學士大夫都邑野人莫不曉然知治道之所以然雖政
績固自卓越而述作之妙知有助哉至於供奉歌頌祠
祝贊戒勒之金石播之樂府多者千百少數十言體制
紛紛各得其度衆人不給我獨贏餘又何其富也

唐子西

唐子西論文云古樂府命題皆有主意後之人用樂府
爲題者直代其人而措辭如公無渡河須作妻止其夫

之辭太白輩或失之惟退之琴操得體

六經已後便有司馬遷三百五篇之後便有杜子美六經不可學亦不可不學故作文當學司馬遷作詩當學杜子美二書亦須常讀所謂不可一日無此君也

司馬遷敢亂道却好班固不敢亂道却不好不亂道又好是左傳亂道又不好是唐書八識田中若有一毫唐書亦爲來生種業

晚學遽讀新唐書輒能壞人文格舊唐書贊語云人安

漢道之寬平不厭高皇之嫚罵其論唐亡云決江海以救焚焚收而溺至引鶴爵以止渴渴止而身亡亦自有佳處

近世士大夫習爲時學忌博聞者率引經以自強余謂挾天子以令諸侯諸侯必從然謂之尊君則不可挾六經以令百氏百氏必服然謂之知經則不可

東坡赴定武過京師館於城外一園之中余時年十八謁之問余觀甚書余云方讀晉書卒問其中有甚好亭

子名余茫然失對始悟前輩觀書用意蓋如此

上蔡司空書云文章於道有離有合不可一槩忽也前世韓退之柳子厚近世歐陽永叔尹師魯王深父輩皆有文在人間其詞何嘗不合於經其旨何嘗不入於道行之於世豈得無補而可以忽略都不加意乎竊觀閣下輔政既以經術取士又使習律習射而醫筭書畫悉皆置博士此其用意豈獨遺文章乎而自頃以來此道幾廢場屋之間人自爲體而立意造語無復法度宜詔

有司取士以古文為法所謂古文雖不同偶儷而散語之中暗有聲調其步驟馳騁亦皆有節奏非但如今日苟然而已今士大夫間亦有知此道者而時所不尚皆相率遁去不能自見於世宜稍稍收聚而進用之使學者知所趨向不過數年文體自變使後世論宋朝古文復興自閣下始此亦閣下之所願也

魏文帝即位求孔融之文以為不減班揚晉武帝踐阼詔定諸葛亮故事而比之周誥融既魏武之讎恨而亮

亦晉宣之仇敵二人之言宜非當時之所欲聞而並見收錄惟恐其墜失蕩然無忌猶有先王大公至正之道存焉此吾所以特有取於魏晉也

葉夢得

葉夢得云古書多奇險或謂當時文體云爾然列子字古而辭平老子字與辭俱平偶儷音諧略同秦漢間工於文者而視古則稍異乃知奇險未必皆其體亦各自其為之者至孟子莊周雄辨閎衍如決江河如蒸雲霧

殆不可以文論蓋自其為道出之商書伊訓說命等非
不平而盤庚特異周詩雅頌非不平而鴟鴞雲漢二篇
殆不容讀豈非繫其人乎使西漢之文不傳後世乃見
太元謂西漢皆然亦不可矣文章自東漢後頓衰至齊
梁而掃地豈惟其文之衰觀當時人物立身謀國未有
一特然出羣者何以獨能施之於文至唐終始三百年
僅能成一韓退之使退之如王楊盧駱之徒亦不能為
矣

許顗

許顗云古人文章不可輕易反覆熟讀加意思索庶幾其見之東坡送安惇落第詩云故書不厭百回讀熟讀深思子自知僕嘗以此語銘座右而書諸紳也

潛溪詩話云老坡作文工於命意必超然獨立於衆人之上如趙清獻碑世間稱治人者曰寬立朝者曰直蓋已大矣則進於二者又有說焉故曰其於治郡不專於寬時出猛政嚴而不殘其在朝廷不專於直為國愛人

掩其疵疾如吾家蜀公堅卧不起人知其高而不稱其
用則為碑銘曰世皆謂公貴身賤名孰知其功聖人之
清然後知其有功於世也又曰君實之用出而時施如
彼水火寧除渴飢公雖不用亦相其行如彼山川出雲
相望然後知其相為表裏廢一不可也此皆非世人所
能到者平日得意處多如此其源蓋出於莊子故其論
劉伶莊子阮千里閻立本皆於世人意外別出眼目其
平日取舍文章亦多以此為法晚年乃言之曰詞達而

已詞至於達則疑於不文是不然求物之妙如繫風捕影能了然於心者千萬人而不一遇也況能了然於手與口乎是之謂詞達詞至於達則文不可勝用矣

王彥輔

王彥輔塵史楚詞招魂大招其末盛稱洞房翠帷之飾美顏秀頰之列瓊漿載羹之烹新歌鄭衛之娛日夜沉湎與象棋六博之樂夫所以訾楚者深矣其卒云魂兮歸來正始昆只言往者既不可以正尚或以解於後耳

又曰賞罰當只尚進士只

案楚詞今本作尚賢士只

國家為只尚三

王只皆思其來而反其政者也

梁任昉集秦漢以來文章名之始目曰文章緣起自詩

賦離騷至於勢約

案勢約原作藝約昉此編終於崔瑗草書勢王褒僮約共八十五也今改

正

八十五題可謂博矣既載相如喻蜀不錄揚雄劇美

錄解嘲而不取韓非說難取劉向列女傳而遺陳壽三國志評至韓柳元結孫樵又作原如原道原性之類又作讀如讀儀禮鵠冠之類又作書如書段太尉逸事訟

如訟風伯訂如訂樂等篇嗚呼文之體可謂極矣今略
疏之續彥昇之志也任昉以三言詩起晉夏侯湛唐劉
存以為始於鷺子飛醉言歸任以頌起漢之王褒劉以
始於周公時邁任以檄起漢陳琳檄曹操劉以始於張
儀檄楚任以碑起於漢惠帝作四皓碑劉以管子謂無
懷氏封太山刻石紀功為碑任以銘起於始皇登會稽
山劉以蔡邕銘論黃帝有金几之銘其始也若此者尚
十餘條或討其事名之或因其成篇而論雖有不同然

不害其多聞之益

顏氏家訓亦足以為良至論文章以游夏孟荀枚乘張衡左思為狂而又詆忤子雲吾不取焉唐柳冕常言文章當以氣為主而世以謂賦者古詩之流亦足以觀其志如王沂公作狀元為殿試有物混成賦其間曰得我之小者散而為草木得我之大者聚而為山川此有陶鎔萬物之度後果為相范文正賦金在鎔曰若令區別妍蚩願為軒鑒儻使削平禍亂請就干將人以謂有出

將入相之器果為名臣

王履道

王履道答吳檢法書云辱枉書并近詩伏承吏事簡少
雍容文史樂道無悶起居休勝感慰不已某廢放之久
雖非幻未證而諸幻已空無還尚隔而可還略盡公獨
以文何耶少小之過不由師授妄作文果何物哉向上
諸聖雖寓此以見仁義道德之意然文非仁非義非道
非德實則辭也易有聖人之道四而以言者尚其辭辭

之為尚欲以行遠不工則不達謂文曰道吾不求工此
非某之所敢知將求天下之工於辭者斯則有以驗之
辭必工而可出愈出而不窮屈原以來作者皆覩此祕
而可操以馭者竊嘗有得於莊周司馬相如周之論風
其辭若與風俱鳴於衆竅掩卷而坐猶覺參參之逼耳
其論真人曰與乎其觚而不堅也張乎其虛而不華也
邴邴乎其似喜乎崔乎其不得已乎凡累數十句危如
易轉之卵而層起曼如獨縲之蠶而不絕相如賦大人

有言曰低昂夭矯反以驕驚詘折隆穹躩以連卷沛艾
赴蟻汜以怡儼兮放散畔岸驤以孱顏如此等甚多則
夫乘雲氣御飛龍之狀亦可想見架空鑿堅刊陳趨新
何其來之亶亶也有得於此則太史公龜筮日者傳可
識其機杼韓退之南山詩柳子厚晉問不能以汪洋屈
河伯項在京國每以語人固有不以為難者指事而擬
之率不過三數語則重複宕跌不復從順而識職年來
竄身荒遠斗絕之地意謂文人勝士所不遊近徙舂陵

有以公壺中五如石詩相示者輒誦剡苔掬月激電浮瀛之句數過侏儒觀一節若專車馬則必枕鼓之士某雖未多見公它作必知公之不窮也

作鄆城杜澤之詩集序云詩於文章雖止一端而律度至嚴資取至廣寫景狀物之作無窮盡天地造化四時月星雨雪江河濤波草木華實風土之宜鳥獸羽毛鳴聲之辨耳聞而目及者皆吾詩之所取登高望遠感慨欣戚別離酬贈興寄輾轉發於人情而達於世故哀思

而不傷和樂而不流要必合於理義之歸倚撫故實追詠當時之事則又欲意到辭達不類後世所作而觀者至於太息流涕若身親見之詩之工其難如此故天下之書雖山經地志花譜藥錄小說細碎當無所不讀古今之詩雖巖棲谷隱漏篇缺句衆體環怪當無所不講前輩長老以此用心至苦終身不以為易謾謾然常若有所思惟恐見聞之不富句法之不逮古人也蓋專於詩者每如是李太白杜子美它文不多見於世韓退之

柳子厚劉夢得文冠百代其詩皆天下之奇作而言詩者終不以先李杜則李杜於詩專故也論人者以全論詩者以專全者不干一而專者吾何疾焉鄧城杜公澤之某不及見其人而見其詩精深婉約華而不綺清而不癯刊陳而趨新出險而掇奇人所甚嗇而公獨裕然擬古諸篇尤得唐人格法至其貫穿該洽熟復殫盡則前輩長老多聞博識之風猶可想見蓋公自熙寧中擢進士第及與先生長者游至老手不釋書平居作詩不

一日輟故某探言公用志之專以序公詩且以風吾黨之士工未盡而力有餘者使尚勉焉

餘師錄卷三

欽定四庫全書

餘師錄卷四

宋 王正德 撰

朱少章

朱少章云歐公在潁上日取新唐書列傳令子棐讀而公卧聽之至藩鎮傳叙嗟賞曰若皆如此傳其筆力亦不可及也

東坡嘗謂劉壯輿曰三國志注中好事甚多道原欲修之而不果君不可辭也壯輿曰端明曷不爲之坡曰某

雖工於語言恐不是當行家

呂原明

呂原明雜記云杜子美詩云文章一小技於道未爲尊
文者載道之器安得謂之小技顧所用何如耳韓退之
詩曰文章豈不貴經訓乃菑畬此說有可取焉

潘子真

潘子真詩話云東坡作表忠觀碑荆公寘坐隅葉致遠
楊德逢二人在坐公曰斯作絕似西漢德逢曰司馬相

如揚雄之流乎公曰相如賦子虛大人洎喻蜀文封禪
書耳雄所著太元法言以準易論語未見其叙事典贍
若此也直須與子長馳騁上下坐客又從而贊之公曰
畢竟似子長何語坐客悚然公徐曰楚漢以來諸侯王
表也又云南豐先生曾子固言阿房宮賦鼎鑄玉石金
瑰珠礫棄擲迺邈秦人視之亦不甚惜瑰當作塊蓋言
秦人視珠玉如土塊瓦礫也又言此賦宏壯巨麗馳騁
上下累數百言至楚人一炬可憐焦土其論盛衰之變

判於此矣

劉知幾

劉知幾史通云夫人樞機之發疊疊不窮必有餘音足句爲其始末是以伊惟夫蓋發語之端也焉哉矣兮斷句之助也去之則言語不足加之則章句獲全

又云李陵集有答蘇武書詞彩壯麗音句流靡觀其文體不類西漢人殆後人所爲假稱陵作也缺而不載良有以焉遷史編於李傳中斯爲謬矣

按答蘇武書梁蕭統始收之文選班

國時尚未之見非有意缺之也至史記李陵傳僅附李廣後並不載是書知幾之論誤矣

又云章句之言有顯有晦顯也者繁詞縟說理盡於篇中晦也者省字約文事溢於句外然則晦之與顯優劣不同較可知也夏書云啓呱呱而泣予弗子周書云前徒倒戈血流漂杵虞書云四罪而天下咸服此皆文如閤畧而語實周贍故覽之者初疑其易而為之者方覺其難既而邱明授經師範尼父雖煩約有殊而隱晦無異故其綱紀而言邦俗也則有士會為政魯國之盜奔

秦邢遷如歸衛國忘亡其款曲而言大事也則有使婦
人飲之酒以犀革裹之比及宋手足皆見師人多寒王
巡而拊之三軍之士皆如挾纊斯皆言近而旨遠辭淺
而義深雖發語已殫而含意未盡晦之時義不亦大哉
洎班馬二史亦時有斯語至若高祖亡蕭何如失左右
手漢兵敗績淮水爲之不流董生乘馬三年不知牝牡
翟公之門可設雀羅此皆用晦之道也

又云左傳叙晉敗於邲先濟者賞而云上軍下軍爭舟

按邲戰中軍下軍爭舟時上軍固未動也此云上軍誤

舟中之指可掬夫不言攀

舟亂以及斷指而曰舟指可掬則讀者自覩其事矣至王劭齊志述高季武破敵於韓陵追奔逐北而云夜半方歸槩血滿袖夫不言奮勇深入擊刺甚多而但稱槩血滿袖則聞者亦知其義矣蓋二者文雖缺畧理甚昭著

李方叔

李方叔云文章之不可無者有四一曰體二曰志三曰

氣四曰韻述之以事本之以道考其理之所在辨其義之所宜庠高巨細包括并載而無所遺左右上下各有其職而不亂者體也體立於此折衷其是非去取其可否不徇於流俗不謬於聖人抑揚損益以稱其事彌縫貫穿以足其言行吾學行之力從吾制作之用者志也充其體於立意之始從其志於造語之際生之於心應之於口心在和平則溫厚典雅心在恭敬則矜莊威重大焉可使如雷霆之奮鼓舞萬物小焉可使如絡脉之

行出入無間者氣也如金石之有聲而玉之聲清越如草木之有華而蘭之臭芬薌如鷄鶩之間而有鶴清而不羣犬羊之間而有麟仁而不猛如登培塿之邱以觀崇山峻嶺之秀色涉潢汙之澤以觀寒溪澄潭之清流如朱絃之有遺音太羹之有遺味者韻也文章之無體譬之無耳目口鼻不能成人文章之無志譬之雖有耳目口鼻而不知視聽臭味之所能若土木偶人形質皆具而無所用之文章之無氣雖知視聽臭味而血氣不

充於內手足不衛於外若奄奄病人支離顛顛生意消
削文章之無韻譬之壯夫其軀幹枵然骨強氣盛而神
色昏瞢言動凡濁則庸俗鄙人而已有體有志有氣有
韻夫是謂成全四者成全然後於其間各因天姿才品
以見其情狀故其言迂踈矯厲不切事情此山林之文
也其人不必居藪澤其間不必論巖谷也其氣與韻則
然也其言鄙俚猥近不離塵垢此市井之文也其人不
必坐塵肆其間不必論財利也其氣與韻則然也其言

豐容安豫不險不陋此朝廷卿士之文也其人不必列
官寺其間不必論職業也其氣與韻則然也其言寬仁
忠厚有任重容天下之風此廟堂公輔之文也其人不
必位台鼎其間不必論相業也其氣與韻則然也正直
之人其文敬以則邪諛之人其言夸以浮功名之人其
言激以毅苟且之人其言懦而愚捍闔從橫之人其言
辯以私刻核忮忍之人其言深以盡則士欲以文章顯
名後世者不可不謹其所言之文不可不謹乎所養之

德也如此

東坡教人讀戰國策學說利害讀賈誼晁錯趙充國章
疏學論事讀莊子學論理性又須熟讀論語孟子檀弓
要志趣正當讀韓柳令記得數百篇要知作文體面宋
子京筆記云余每見舊所作文章憎之必欲燒棄梅堯
臣喜曰公之文進矣

又云常言俗語文章所忌要在斷句清新令高妙出羣
須衆中拈出時使人人讀之特然奇絕者方見工夫也

又不可使言語有塵埃氣唯輕快玲瓏使文采如月之光華嘗見先生長者欲爲文時先取古人者再三讀之直須境熟然後沉思格體看其當如何措置却將欲作之文暗裏鋪摹經畫了方敢下筆踏古人蹤跡以取句法旣做成連日改之十分改就見得別無瑕疵再將古人者又讀數過看與所作合與不合若不相懸遠不致乖背方寫淨本出示他人貴合衆論非獨耐看兼少問難耳人之爲文切忌塵坌須是一言一句動衆駭俗使

人知其妙意新語中心降歎不厭諷味方成文字也

秦會之

秦會之示孫云魯南豐辟陳無已邢和叔爲英宗皇帝
實錄檢討官初呈藁無已便蒙許可至邢乃遭橫筆又
微聲數稱亂道邢尚氣跽以請曰願善誘南豐笑曰措
辭自有律令一不當即是亂道請公讀試爲公隱括邢
疾讀至有百餘字南豐曰少止涉筆書數句邢復讀南
豐應口以書畧不經意既畢授歸就編歸閱數十過終

不能有所增損始大服自爾識關鍵以文章軒輊諸公
間初南豐未冠從歐陽公遊又先以道義友王荊公間
攜王文編示歐公公曰文不如是反累正氣荊公聞痛
自洒濯終不能脫晚歲掉頭揆路棲遲邱壑始有蕭散
氣象然猶琢句曰木落山林成自獻水歸洲渚得橫陳
一水護田將綠遶兩山排闥送青來雕篆之士雖膾炙
談藪而於公則未為老成也山谷高吟交臂老杜至古
文不自謂所長每推無已但云得句法於魯太史故荊

公詩曰魯子文章世無有水之江漢星之斗無已詩曰
向來一瓣香敬為魯南豐蓋南豐淵源西漢無已親炙
南豐射策始西漢而董相為舉首平津踵武擢為第一
無已雖不事舉業而擬試二篇論正似董辭嚴過公孫
而乃困於穎尾不知飽味每有良朋况也永歎而已

范元實

潛溪范元實詩眼云孫莘老嘗謂老杜北征詩勝退之
南山詩王平甫以為南山勝北征終不能相服時山谷

尚少乃曰若論工巧則北征不及南山若書一代之事以與國風雅頌相為表裏則北征不可無而南山雖不作未害也二公之論遂定時曾子固曰司馬遷學莊子班固學左氏班馬之優劣即莊左之優劣也公又曰司馬遷學莊子既造其妙班固學左氏未造其妙也然莊子多寓言駕空為文章左氏皆書事實而文詞不減莊子則左氏為難子固亦以為然

裴度

裴度寄李翱書云昔人有見小人之違道者耻與之同
形貌共衣服遂思倒置眉目反易冠帶不知其倒之之
非也故文之異在氣格之高下思致之淺深不在磔裂
章句隳廢聲韻也人之異在風神之清濁心志之通塞
不在於倒置眉目反易冠帶也

洪覺範

按僧惠洪字覺範姓喻氏後易名德洪此
以洪為姓非是然晁氏讀書志標目亦稱

洪覺

範云

洪覺範冷齋夜話云李格非善論文章嘗曰諸葛孔明

出師表劉伶酒德頌陶淵明歸去來辭李令伯乞養親表皆沛然如肺肝中流出殊不見斧鑿痕是數君子在後漢之末兩晉之間初未嘗欲以文章名世而其辭意超邁如此是知文章以氣為主氣以誠為主

蔡條

蔡條西清詩話云王文公見東坡醉白堂記云此乃是韓白優劣論東坡聞之曰不若介甫虔州學記乃學校策耳二公相誚或如此然勝處未嘗不相傾慕元祐間

東坡奉祠西太一宮見公舊時詩云楊柳鳴蜩綠暗荷花落日紅酣三十六陂春水白頭想見江南注目久之曰此老野狐精也

陸士衡

案此條前引陸機之言後引孫覲之言文不相屬以陸士衡標題疑有脫誤

陸士衡文賦云詩緣情而綺靡賦體物而瀏亮碑披文而相質誄纏綿而悽愴銘博約而溫潤箴頓挫而清壯頌優游以彬蔚論精微而通暢奏平徹以閑雅說煒燁而譎誑孫仲益云某見前輩文字褒賞一時名士如東

坡最多可徃徃過其實惟荆公未嘗以言假人而南豐
為尤嚴比見郭祥正得荆公數帖皆稱道其詩者中一
帖云子固之言不知所謂豈非足下天才超軼尚當繩
以古詩之法乎是知祥正者荆公所予而南豐不予也

張說

張說與徐堅論近世文章說曰李嶠崔融薛稷宋之問
之文如良金美玉無施不可富嘉謩如孤峯絕岸壁立
萬仞濃雲鬱興震雷俱發誠可畏也若施於廊廟駭矣

閭朝隱如麗服靚粧燕歌趙舞觀者忘疲若類之風雅則罪人矣堅問今世奈何說曰韓休之文如太羹元酒有典則而薄滋味許景先如豐肌膩體雖穠華可愛而乏風骨張九齡如輕縑素練實濟時用而窘邊幅王翰如瓊杯玉笋雖爛然可珍而多玷缺堅謂篤論云

魏文帝

魏文帝典論云夫文本同而末異蓋奏議宜雅書論宜理銘誄尚質詩賦欲麗此四科不同故能之者偏也唯

通才能備其體文以氣為主氣之清濁有體不可力彊而致譬諸音樂曲度雖均節奏同檢至於引氣不齊巧拙有素雖在父兄不能以移子弟

蘇東坡

蘇東坡與秦太虛書云太虛未免求祿仕方應舉求之應舉不可必竊為君謀宜多著書如所示論兵及盜賊等數篇但似此得數十首皆卓然有可用之實者不須及時事也但旋作此書亦不可廢應舉

答李廌書云惠示古賦近詩詞氣卓越意趣不凡甚可喜也但微傷冗後當稍收斂之今未可也足下之文正如川之方增當極其所至霜降水落自見涯涘然不可不知也

答張文潛書云惠示文編三復感嘆甚矣君之似子由也子由之文實勝僕而世俗不知乃以為不如其為人深不願人知之其文如其為人故汪洋澹泊有一唱三歎之聲而其秀傑之氣終不可沒作黃樓賦乃稍自振

鴈若欲以警發憤憤者而或者便謂僕代作此尤可笑
是殆見吾善者機也文字之衰未有如今日者也其源
實出於王氏王氏之文未必不善也而患在於好使人
同己自孔子不能使人同顏淵之仁子路之勇不能以
相移而王氏欲以其學同天下地之美者同於生物不
同於所生惟荒瘠斥鹵之地彌望皆黃茅白葦此則王
氏之所同也

答虔倅俞括書云孔子曰辭達而已矣物固有是理患

不知知之患不能達之於口與手所謂文者能達是而已文人之盛莫如近世然私所敬慕者獨陸宣公一人家有奏議善本頃侍講讀嘗繕寫進御區區之忠自謂庶幾於孟軻之敬王且欲推此學於天下使家藏此方人挾此藥以待世之病豈非仁人君子之至情也哉今觀所示議論自東漢以下十篇皆欲酌古以馭今有意於濟時之用而不志於耳目之觀美此正平生所望於朋友與凡學道之君子也然去歲在都下見一醫工頗

藝而窮慨然謂僕曰人所以服藥為治病耳若適於口
莫如芻豢何以藥為今孫氏劉氏皆以藥顯孫氏期於
治病不擇甘苦而劉氏專務適口病者宜安所去取而
劉氏富倍孫氏此何理也使君斯文未必售於世然售
不售豈吾儕所當掛口哉

答王庠書云所示著述文字皆有古作者風力大畧能
道意所欲言者孔子曰辭達而已矣辭至於達止矣不
可以有加矣經說一篇誠哉是言也西漢以來以文設

科而文始衰自賈誼司馬遷其文已不逮先秦古書況其下者文章猶爾況所謂道德者乎若論周勃則恐不然平勃未嘗一日忘漢陸賈為之謀至矣彼視祿產猶几上肉但將相調和則大計自定若如君言先事經營則呂后覺悟誅兩人而漢亡矣某少時好議論古人既老涉世更變往往悔其言之過故樂以此告君也儒者之病多空文而少實用賈誼陸贄之學殆不傳於世老病且死獨欲教子弟豈意姻親中乃有王郎乎

答謝民師書云所示書教及詩賦雜文觀之熟矣大略如行雲流水初無定質但常行於所當行常止於不可不止文理自然姿態橫生孔子曰言之不文行之不遠又曰詞達而已矣夫言止於達意則疑若不文是大不然求物之妙如繫風捕影能使是物了然於心者蓋千萬人而不一遇也而況能使了然於口與手乎是之謂詞達詞至於能達則文不可勝用矣揚雄好為艱深之詞以文淺易之說若正言之則人人知之矣此正所謂

雕蟲篆刻者其太元法言皆是物也而獨悔於賦何哉
終身雕蟲而獨變其音節使謂之經可乎屈原作離騷
經蓋風雅之再變者雖與日月爭光可也可以其似賦
而謂之雕蟲乎使賈誼見孔子升堂有餘矣而乃以賦
鄙之至與司馬相如同科雄之陋如此比者甚衆可與
知者道難與俗人言也因論文偶及之耳歐陽文忠公
言文章如精金美玉市有定價非人所能以口舌貴賤
也紛紛多言豈能有益於左右愧悚不已

答劉沔都曹書云識真者少蓋從古所病梁蕭統集文
選世以為工以軾觀之拙於文而陋於識者莫統若也
宋玉賦高唐神女其初略陳所夢之因如子虛亡是公
相與問答皆賦矣而統謂之叙此與兒童之見何異李
陵蘇武贈別長安而詩有江漢之語及陵與武書詞句
儼淺正齊梁間小兒所擬作決非西漢文而統不悟劉
子元獨知之范蔚宗作蔡琰傳載其二詩亦非是董卓
已死琰乃流落方卓之亂伯喈尚無恙也而詩乃云以

卓亂故流入於胡此豈真琰語哉其筆勢乃效建安七子者非東漢詩也李太白韓退之白樂天詩文皆為庸俗所亂可為太息

南行詩叙云夫昔之為文者非能為之為工乃不能不為之為工也山川之有雲草木之有華實充滿勃鬱而見於外夫雖欲無有其可得邪自少聞家君之論文以為古之聖人有所不能自己而作者故軾與弟轍為文至多而未嘗敢有作文意

鳧繹先生詩集叙云昔吾先君適京師與卿士大夫遊
歸以語軾曰自今以往文章其日工而道將散矣士慕
遠而忽近貴華而賤實吾已見其兆矣以魯人鳧繹先
生之詩文十餘篇示軾曰小子識之後數十年天下無
復為斯文者也先生之詩文皆有為而作精悍確苦言
必中當世之過鑿鑿乎如五穀必可以療飢斷斷乎如
藥石必可以伐病其遊談以為高枝詞以為觀美者先
生無一言焉其後二十餘年先君既沒而其言存士之

為文者莫不超然出於形器之表微言高論既以鄙陋
漢唐而其反復論難正言不諱如先生之文者世莫之
貴矣

王定國詩集序云太史公論詩以為國風好色而不淫
小雅怨誹而不亂以余觀之是特識變風變雅耳烏覩
詩之正乎昔先王之澤衰然後變風發乎情雖衰而未
竭是以猶止於禮義以為賢於無所止者而已若夫發
乎性之忠孝者其詩豈可同日語哉古今詩人衆矣而

杜子美為首豈非以其流落飢寒終身不用而一飯未嘗忘君也歟

樂全先生文集叙云孔北海志大而論高功烈不見於世然英偉豪傑之氣自為一時所宗其論盛孝章郝鴻豫書慨然有烈丈夫之風諸葛孔明不以文章自名而開物成務之姿綜練名實之意自見於言語至出師表簡而盡直而不肆大哉言乎與伊訓說命相表裏非秦漢以來以事君為悅者所能至也

錢希白

按青箱雜記馬氏晁氏俱云吳處厚撰宋志作黃朝英誤朝英所撰係細素雜記此

作錢希白亦誤希白所撰係洞微志

錢希白青箱雜記云范文正公幼孤隨母適朱氏因冒朱姓名悅後復本姓以啓謝時宰曰志在投秦入境遂稱於張祿名非霸越乘舟乃效於陶朱以范睢范蠡亦嘗改姓名故云又僞蜀翰林學士范禹偁亦嘗冒張姓復姓有啓謝郡守云昔年上第誤標張祿之名今日故園復作范睢之裔然不若文正公之精巧

余皇祐壬辰歲取國學解試律設大法賦得第一名時

樞密邵公

亢

翰林賈公

黯

密直蔡公

抗

脩注江公

林

並

為考試官

按蔡抗宋史有二人此乃蔡挺之兄抗為樞密直學士非樞密院編脩直祕閣之蔡抗也

江林當作江休復判鹽鐵院脩起居注者是也

江公尤見知語余曰滿場程試

皆使蕭何唯足下使蕭規對漢約足見其追琢細膩又

所問春秋策對答詳備及賦押秋茶之密用唐宗赦受

縑事諸君皆不見云只有秦法繁於秋茶密於凝脂然

則君何出余避席斂衽因對曰文選策秀才文有解秋

茶之密網唐宗赦受縑事出杜佑通典唐書即不載公大喜又曰滿場使次骨皆作刺骨對凝脂惟足下用杜周傳作次骨又對吹毛只這亦堪作解元

本朝夏英公亦嘗以文章謁盛文肅文肅曰子文章有館閣氣異日必顯後亦如其言然余嘗究之文章雖皆出於心術而實有兩等有山林草野之文有朝廷臺閣之文山林草野之文則其氣枯槁憔悴乃道不得行著書立言者之所尚也朝廷臺閣之文其氣溫潤豐縟乃

得位於時演綸視草者之所尚也故本朝楊大年宋宣
獻宋莒公胡武平每撰制詔皆婉美淳厚過於前世燕
許盧楊遠甚卜其為人亦各類其文章王安國嘗語余
曰文章格調須是官樣豈安國言官樣亦謂有館閣氣
耶又今世樂藝亦有兩般格調若教坊格調則婉媚風
流外道格調則麤野嘲啗至於村歌社舞則又甚焉茲
亦與文章相類

楊文公為執政所忌母病謁告不俟朝旨徑歸韓城與

弟倚居踰年不調公有啟謝朝中親友曰介推母子願
歸綿上之田伯夷弟兄甘受首陽之餓後除知汝州而
希旨言事者攻議不已公又有啟與親友曰已擠溝壑
猶下石而未休方困蒺藜尚關弓而相射胡武平嘗奉
勅撰溫成皇后哀冊文受旨以溫成嘗因禁卒竊發捍
衛有功而秉筆者不能文其實公乃用西漢莽何羅觸
瑟馮媛當熊二事以狀其意曰在昔禁闈誰何弛衛觸
瑟方驚當熊已厲覽者無不歎服王禹偁尤精四六有

同時與之在翰林而大拜者王以啟賀之曰三神山上
曾陪鶴駕之遊六學士中獨有漁翁之歎以白樂天嘗
有詩云元和六學士五相一漁翁故也

李宗諤

按倦游雜錄八卷宋藝文志及馬氏晁氏俱云張師正撰此云李宗諤似誤

李宗諤倦游雜錄云終慎思大名人家貧苦學衣冠故
敝風貌寢陋始來應舉魏之舉人視之蔑如也既就試
遂為解首其謝解啟曰三年於此衆人悉指於毛生一
軍皆驚大將果歸於韓信又董儲郎中慙其窮嘗以書

薦于士人之富者庶濡涸轍而士人殊無哀王孫之意
終復取書歸而具啓納于董曰魯箭高飛謂聊城之必
下秦都不割懷趙壁以空歸人多嘉其切當

張君芳

按湘山野錄六卷宋藝文志馬氏通考晁氏讀書志俱題僧大瑩撰張君房所撰係

乘異記勝說雲笈七籤也此誤又以房為芳更誤

張君芳湘山野錄云真宗即位之次年賜李繼遷姓名
而復進封西平王時宋湜宋白蘇易簡張洎在翰林俾
草詔冊皆不稱旨惟宋公湜深順上意必欲推先帝欲

封之意因進辭曰先皇帝早深西顧欲議真封屬軒鼎
之俄遷逮漢壇之未建故茲遺命特付眇躬爾宜望弓
劒以拜恩守疆場而効節上大喜不數月叅大政

晏元獻公撰章懿李太后神道碑破題云五嶽崢嶸崑
山出玉四溟浩渺麗水生金蓋言誕育聖躬實繫懿后
奈仁宗夙以母儀事明肅劉太后膺先帝擁佑之託難
為直致然論者則愛其善比也獨仁宗不悅謂晏曰何
不直言誕育朕躬使天下知之晏公具以前意奏之曰

此等事卿宜直之區區不足較當更別改晏曰已焚草
於神寢上終不悅逮升祔二后赦文孫承旨扑當筆協
聖意直叙曰章懿太后丕擁慶羨實生眇冲顧復之恩
深保綏之念重神御既往仙遊斯邈嗟乎為天下之母
育天下之君不逮乎九重之承顏不及乎四海之致養
念言一至追慕增結上覽之感泣彌月明賜之外悉以
東宮舊玩密賚之歲餘叅大政

歐陽永叔

歐陽永叔歸田錄云夏英公竦父官於河北景德中契
丹犯河北遂歿于陣後公為舍人丁母憂起復奉使契
丹公辭不行其表云父歿王事身丁母憂義不戴天難
下穹廬之拜禮當枕塊忍聞禁棘之音當時以為四六
偶對最為精絕

楊億

楊億談苑云陶穀晉開運中為詞臣時北戎來侵而楊
光遠以青州叛大將馬節卒少帝召穀草文以祭之穀

立具草以奏曰漢北有不賓之虜山東屯伐叛之師雲陣未收將星先落少帝甚激賞

僧文瑩

僧文瑩玉壺清話云王狀元君貺天聖庚午甲科及第元豐戊午垂五十年方有重金之賜謝表特優略云橫金三紀未佩隨身之魚賜帶萬釘改觀在廷之目豈伊散任得拜恩章車服以庸品儀辨等國朝故事惟二府刻毬路之花

按夢溪筆談宋太宗創方團毬帶賜二府文臣其後樞密使兼侍中張耒王貽永皆

特賜宋史拱辰傳元豐初轉南院使賜金方團帶邵氏
聞見錄云拱辰出判北京時賜笏帶毬露金帶佩魚以
路作露而范成大詩苔架塵侵毬路暗花書墨漬笏頭
斑又仍作路蓋毬路是花樣之名故費氏蜀錦譜有毬
露錦齊東野語載御府臨六朝唐人法
帖用毬露錦本係俗呼不必有定字也 文武近班通一

例號羣仙之樣特承面命越度朝規此蓋陛下寵厚老

臣禮加常例憫事三朝之舊俾偕四輔之榮奉以垂腰

既表重錡之麗寶之在體更增上笏之華

按江淹擬袁太尉淑從駕

詩和惠頒上笏恩
渥決下筵疑用此

李翱

李翱答皇甫湜書僕近寫得唐書史官才薄言詞鄙淺
不足以發揚高祖太宗列聖明德使後之觀者文采不
及周漢之書僕以為西漢十一帝高祖起布衣定天下
豁達大度東漢所不及其餘唯文宣二帝為優自惠景
以下亦不皆明於東漢明章兩帝而前漢事跡灼然傳
在人口者以司馬遷班固敘述高簡之工故學者悅而
習焉其讀之詳也足下讀范蔚宗漢書陳壽三國志王
隱晉書生熟何如左邱明司馬遷班固書之溫習哉故

溫習者事迹彰而罕讀者事迹晦讀之疏數在詞之高
下理必然也唐有天下聖明繼於周漢而史官叙事曾
不如范蔚宗陳壽所為況足擬望左邱明司馬遷班固
之文哉僕文采雖不足以希左邱明司馬子長足下視
僕叙高慙女楊烈婦豈盡出班孟堅蔡伯喈之下耶

又答朱載言書行已莫如恭自責莫如厚接衆莫如宏
用心莫如直進道莫如勇受益莫如擇友好學莫如改
過此聞之於師者也相人之術有三迫之以利而審其

邪正設之以事而察其厚薄問之以謀而觀其智與不
智則賢不肖分矣此聞之於友者也列天地立君臣親
父子別夫婦明長幼決朋友六經之旨也浩乎若江海
高乎若邱山赫乎若日火包乎若天地掇章稱詠津潤
怪麗六經之詞也創意造言皆不相師故其讀春秋也
如未嘗有詩也其讀詩也如未嘗有易也其讀易也如
未嘗有書其讀屈原莊周也如未嘗有六經也故義深
則意遠意遠則理辯理辯則氣直氣直則詞盛詞盛則

文工如山有恒華嵩衡焉其同者高也其草木之榮不
必均也如瀆有濟淮河江焉其同者出源到海也其曲
直淺深色之黃白不必均也如百品之雜焉其同者飽
於腹也其鹹酸苦辛不必均也此因學而知者此創意
之大歸也天下之語文章有六說焉其尚異者則曰文
章辭句奇險而已其好理者則曰文章叙意苟通而已
其溺於時者則曰文章必當對其病於時者則曰文章
必不當對其愛難者則曰文章宜深不當易其愛易者

則曰文章宜通不當難此皆情有所偏滯而不流未識文章之所主也義不深不至於理言不信不在於教勸而詞句怪麗者有之矣劇秦美新王褒僮約是也其理徃徃有是者而詞章不能工者有之矣劉氏人物志王氏中說傅氏太公家教是也古之人能極於工而已不知其辭之對與否易與難也詩曰憂心悄悄愠於羣小此非對也又曰邁閔既多受侮不少此非不對也書曰聖讒說殄行震驚朕師詩曰苑彼桑柔其下侯甸將采

其劉廌此下民此非易也書曰允恭克讓光被四表格
於上下詩曰十畝之間兮桑者閒閒兮行與子旋兮此
非難也學者不知其方而稱說云云如前所陳者非吾
之敢聞也六經之後百家之言與老聃列禦寇莊周鶡
冠田穰苴孫武屈原宋玉孟軻吳起商鞅墨翟鬼谷子
荀況韓非李斯賈誼枚乘司馬遷相如劉向揚雄皆足
以自成一家之文學者之所師歸也故義雖深理雖當
詞不工者不成文宜不能傳也文理義三者兼並乃能

獨立於一時而不泯滅於後代能必傳也仲尼曰言之無文行之不遠子貢曰文猶質也質猶文也虎豹之鞞猶犬羊之鞞此之謂也陸機曰怵他人之我先韓退之曰唯陳言之務去假令述笑哂之狀曰莞爾則論語言之矣曰啞啞則易言之矣曰粲然則穀梁子言之矣曰攸爾則班固言之矣曰覲然左思言之矣吾復言之與前文何以異也此造言之大歸也

孔臧

孔臧與子琳書云聞汝與諸友講肄書傳孜孜晝夜衍
衍不怠善矣人之進道唯問其志取必以漸勤則得多
山澗至柔石為之穿蝸蟲至弱木為之弊然而能以微
脆之形陷堅剛之體豈非致之有漸乎

胡牧

胡牧漁隱叢話云高適年五十始學為詩而與李杜抗
衡正獻公杜衍暮年乃學草書筆勢翩翩遂逼晉魏軌
謂秉燭不逮夜遊哉

韓子蒼

韓子蒼上宰相書云某幼而喜為文至今二十年矣於文無所不觀始誦其言中探其義卒明其道其言則自簡編以來凡可以使人駭心動目者皆是也其義則學士大夫類能言之矣故缺而不論而獨論其道焉夫文者何為也聖人所以探深索隱而化天下者也是故神而明之者君也輔而翼之者相也輔而陳之者卿大夫也而士不預焉夏商以前其文逸矣然見於後世者非

宓義堯舜禹湯之所為則臯陶益稷伊傅之所作也當
是時不聞有卿大夫以文顯於世而況於士乎彼非有
所不能也文事興於上則在下者無事乎此也今夫易
之彖象則是聖人所以開物成務者也詩之風諭則是
聖人所以移風美教者也書之訓誓則是聖人所以發
號敷命而春秋之紀事則是聖人所以勸善懲惡者也
此數者皆聖人所操持以為化天下之具則士安得預
其間哉周衰開物成務之道不行於上而後孔子彖而

象之勸善懲惡之道不行於上而後孔子筆則筆削則削以至移風美教之道不行而後三百五篇定焉發號敷命之道不行而後百篇叙焉凡孔子之所修皆上述堯舜禹湯而下述益稷伊傅以示後世而已非有意乎自為文也後之學者不求其道而求其義不求其義而求其言求其言者斯為下矣而尚有不能盡則其餘道豈萬分之一乎嗚呼自六經而後文體何其多變也其源皆出於六經而寢失其體是故學象象者其流則為

論為義學筆削者其流則為傳為記學三百五篇者其
流則為箴銘賦贊學百篇者其流則為表啓疏檄又於
其間增之以浮誇雜之以靡麗則文之用於下者多而
施於上者寡矣故後世工文者率皆布衣窮居之士而
時君國相以是為虛飾凡先王所以化天下之具至是
而為一小技爾豈不深可惜哉宋以文德為治今上睿
文益高赫赫昭昭已高出五帝三王之右矣又選於衆
而用相公伏惟相公以大儒經世之文當元宰秉鈞之

任以昌言則益稷以賡歌則皋陶以對揚則傳說其設
於政事則又兼前代之軌模聳遠方之瞻聽蓋道之不
行千有餘歲矣於此時而吾君神明之於上吾相輔翼
之於下則是萬世之一時也以今準古雖無預於文然
上既責學者以古聖人之道而士困於餘習文不能近
六經至有漢晉之弊有志之士咸知患此而獨未有推
言之者某不佞以為當萬世之一時而不言則古道當
何時而興耶方今去孔子已千歲而去夏商則又遠矣

如欲恢復古道必將自其言始使立言者其體稍近六經則於道或得其一二下焉不為漢晉之文上焉有以助吾君吾相化天下之道甚非小補也

洪邁

洪邁作楚東訓倡序云次韻作詩於古無有春秋時列國以百數聘問相銜於道拜賜告成責言歲事周旋交際蓋未嘗不賦詩然所取正在三百篇中初非抒意作也蘇李河梁之別建安之七子潘陸顏何陶沈二謝洞

庭瀟湘之闕池草澄江之句曲水斜川之集聯翩迭出
重酬累贈雙聲疊韻浮音切響法度森嚴圓轉流麗獨
未聞以韻為工者高蜀州嚴鄭公韋近

按韋氏見於杜集最多可指名

者洹濟見素宙偃瀆班諷有夏之晉匡贊迨等是也不
載名者尹書記評事贊善司直郎官侍御史少府等是也
獨不見有韋近而諸韋中惟迨自潭移韶
杜以詩往復者數四疑近乃迨字之譌

郭受來往杜

少陵間有唱必報率不過和意而已韓詩三百七十一

唯陸渾山火一篇曰次韻而與孟東野變化上下者廼

四之

按韓詩唐李漢編者三百八十一首宋五百家注
魏仲舉所集者三百九十
本朝顧嗣立集注三

百八十七篇益以集外者為四百十三此云三百七十
一恐誤陸渾山火詩集作用韻洪興祖云作次韻者非
是劉貢父謂用其韻者不必次然湜此詩不見於世貢
父何所據而云耶韓孟聯句見韓集者十篇尚有有所
思遣興贈劍客三篇見於孟
集蓋居酬和諸詩十之四云十聯句中使其以工韻為

勝吾知其神施鬼設百出而百不窮磊隗春容靡紫青
而檄膠葛也自夢得樂天微之諸人茲體稍出極於東
坡山谷以一吟一詠轉相簡答未嘗不次韻妍詞秘思
因險見奇搜羅捷出爭先得之為快滴滴乎舟一葉而
杭灩澦也岌岌乎其索驪龍之睡也盎盎乎朝華之舞

春琅琅乎朱絃之三歎也翼乎鵬鷃之戛秋空也淵乎其色傾國也詩至是極矣



餘師錄卷四